

սովորաբար, հաստիլիկ, կարճլիկ մի մարդ է բարի դէմքով: Մեզ ընդունեց մեծ սիրով, սեղմեց ձեռքերնիս եւրոպայւարի, բարեւեց մեզ մի թոթով ուսներէնով. եւ իսկոյն հրամայեց թէյ բերեն:

Ճապոնական թէյը հրամցնում են փոքրիկ գաւաթիկներով եւ առանց շաքարի. բայց համեղ կաստերան լիուլի փոխարինում է շաքարի պակասը:

Թէյից յետոյ իեզակին մեզ առաջնորդեց վերի յարկը, ուր իրերն էին ցուցադրւած: Փղոսկրի քանդակումը հիանալի է ուղղակի իր նրբութեամբն ու գեղեցկութեամբը: Ամենից աւելի աչքի ընկնող տեղում գետեղւած էին կրեայի պատեանից շինած ճապոնական ու եւրոպական մի քանի ռազմանակեր:

Կայմերը իրանց կայաններով, պարանները, ելարանները, մինչեւ անգամ սանդուխի իւրաքանչիւր աստիճանը դուրս էր բերւած զարմանալի ճշտութեամբ ու մաքուր:

Իեզակիի այդ մանրանկար գեղարւեստական փոքրիկ աշխարհից մենք ընկանք ուղղակի ժողովրդական ու եռուն առեւտրի տաճարը, ճապոն-բազարը, որ մեր կարաւանսարային համապատասխանող մի բան է:

Դա մի մեծ կլոր շէնք է, ուր խանութների շարքը ձգւում է ճառագայթի ձեւով դէպի կենտրոնը, ապա կենտրոնից դէպի շրջագիծը, կազմելով մի նեղ անընդհատ անցք, որից չես կարող դուրս գալ, մինչեւ որ այդ ամբողջ լաբիրինտը անց չը կենաս իր բոլոր անկիւններովն ու թեքումներովը, եթե միայն, յուսահատած, կէս ճամփիցդ յետ չը դառնաս:

Ապրանքի տեսակները շատ չեն եւ շարունակ կրկնւում են: Մասնաւորապէս շատ կան զանազան գոյնի թաւշեայ քսակներ, զարդ հերկալներ, եւ անթիւ անհամար թղթէ